

Mens

Ne **mins**, **miens** (ZO WVL) of **mens** (NW WVL) (*Homo sapiens* of verstandige mens) is een twêvoetign primoat, die deel uutmakt van de familië van de mensoapn (Hominidae), woa dan ook de orang-oetangs, gorillas en chimpansees in zittn. De mens is d'enigste sôorte van 't geslacht *Homo* da nog leeft. DNA ounderzoek hê getoogd dat de moderne mens omtrent 200.000 joar geleen in Afrika is ountstoan en hem van doaruut over hêel de weireld hê versprêed. De weireldbevolkienge hêt enorm toegenoomn in de latste twêduusd joar, en voarol in de verbye êeuwe. Volgens de latste officiële schattienge stound de bevolkienge in 't midden van 2009 up 6.790.062.216 mensn,^[1] mè grôte bevolkiengsgetalln up olle weirelddêeln beholve Antarctica.

Mensn zyn, gelijk d' oapn, socioale bêestn. Ze scheppn complexe socioale structurn en zyn over 't olgemêen goed in 't kommunikeern met andere mensn. De socioale interaksjes tusschn mensn varieern geweldig mè grôte culturêle verschilln in tradities, rituêeln, ethische weirdn en wettn.

Inoud
Etymologie
Bewustzyn en intelligensje
Evolutionaire geschiedenis van de mens
Anatomie
Vôortplantienge
Mensheid
Menselyke beschoavienge
Interne koppelienge
Referensje

Mens	
Taxonomische indêlienge	
Ryk:	<u>Animalia</u> (Beestn)
<u>Stamme:</u>	<u>Chordata</u> (Chordabêestn)
<u>Klasse:</u>	<u>Mammalia</u> (Zoogbêestn)
<u>Orde:</u>	<u>Primates</u> (Primoatn)
<u>Superfamilie:</u>	<u>Hominoidea</u> (Mensoapn)
<u>Familie:</u>	<u>Hominidae</u> (Mensachtigen)
<u>Geslacht:</u>	<u>Homo</u> (Menschn)
Sorte	
<i>Homo sapiens</i> <u>Carolus Linnaeus, 1758</u>	

Etymologie

't Wôord "mins" of "mens" (Duuts *Mensch*, Zweeds *människa*, Deens *menneske*) is een variante van "man" (Duuts *Mann*, Iengels *man*), die uutendelik weregoat up 't Indo-Europees **man-*: "peizn" of **ma-*: "meetn".

Bewustzyn en intelligensje

De mens is êen van de winnige zoogbêestn met een goed ontwikkeld gêestelyk leevn, en êen van neegn bêestesôortn die de spiegeltest (woardat een bêeste herkent da 't bild in de spiegel een refleksje van zyn eign is, en gin ander bêeste) passeern.


Evolutionaire geschiedenis van de mens

Vergeleekn met veel andere bêestesôortn bestoat de mens voar een relatief korte periode. De moderne mens kwaamt as de Cro-Magnonmens omtrent 40.000 joar geleen noar Europa, moa bestound ol langer in Afrika. Twê schedels gedatêrd up 195.000 joar oud zyn teegn den Omorivier in Ethiopië gevoundn, wa da goed overêenkomt met DNA ounderzoek dat den ôorsprong van *Homo sapiens* up omtrent 200.000 placêrt.

Anatomie

Een mens behôort toet de gewerveldn en as zuks hêt een inwendig geraamte, twê bêenn, twê oarms en een kop. Juuste gelik andere zoogbêestn hêt de mens een bloodvoatstelsel dat deur 't herte is angedreevn, en luchttoevoer da van de loungn komt. De mage en de derms verteirn 't eetn en de niern schêen d' ofvolstoffn uut 't bloed.

't Geraamte van de mens is veranderd van de typische toestand in viervoeters deurda tje up zyn achterpôotn lopt. De ruggegroate nimt de vorm van de letter S an, en 't bekkn ligt anders dan van d' oapn. De ruggegroate komt ook an den ounderkant van de schedel uut in plekke van an den achterkant. Deurdan d' handn nie mè met de vòortbewegienge bezig zyn, zyn ze beterangepast an 't hanteern van vòorwerpn, en voarol de precisiegrepe tusschn den duum en de wysvienger is karakteristiek voa de mens.



Anatomische kenmerkn van mannelike en vrouwelike mensn.

Vôortplantienge

De manier waarup dan mens sex hê mè mankoar is uniek ounder de zoogbêestn (met d' uutzonderienge van de bonobos) dat de penetrasje langs van vòren geburt. De zwangerschap deut 40 weekn (9 moandn) wa da korter is dan da je zou verwachtn voar een zoogbêeste van een mens zyn gròotte. Da komt omdat anders de kop van een baby te gròot zou zyn voa deur 't bekkn van een vrouwe te kunn'n, en dus wordn olle menselike baby's eigntlik premateur en hulpelòos geboorn. 't Is doavan ook dat in zyn êeste joar de kop van een pasgebòorn kiend nog olsan groeit met de snelheid van een foetus in de boarmoeder.

Mensheid

De mensheid is een verzamelname vòor olle mensn up de weireld met ol ounderlienge socioale relosjes. De mêeste mensn zyn in stoat van over nder eigen te peizn, en nder in de plekke van een ander vòren te stelln. As een groep kan de mensheid ook de technologie ontwikkeln vòr uplossiengn uut te peizn vò economische, wetenschappelyke en polletieke probleemn. Mêeer dan ênig ander bêestesôorte kan de mens zyn eign omgevienge verandern, en kan doadeure in streekn weunn woarda zyn lichoam up zyn eign nie an aangepast is.

Een van de belangrykste eigenschappn van de mens is d' oontwikkelienge van de toale vô kommunikoasje. Dat is in de latste êuwe uutgebrêed deur d' oontwikkelienge van telekommunikaoasje, woadeure dan mensn round de weireld mè mankaor kunn'n klappn.

Menselyke beschoavienge

Mêer dan 90% van den tyd dat de moderne mens bestoan hêt, leefde tje in klêne groepn die jaagdign en een nomoadisch bestoan lêdign. Deurdan mensn informaasje an mankoar kunn'n deuregeevn is de culturêle evoluusje olsmoa rapper beginn'n goan met de toenoame in 't antol mensn. Round 10.000 joar geleen begostn de beweuners van de streke die bekend stoat as de Vruchtboare Sikkkel bêestn en plantn te domestikeern, wa dat anlêdienge gaaf de groei van de landbouw, een gebeurtenisse die bekend stoat as de Neolithische revoluusje.

Deur dat de landbouw mêer mensn kost ounderhoudn wierdn de nomoadn van de beste landbouwground verdreevn, en met de verbeterienge van de landbouwmethoodn wierd het meugelik dat een arbeidsverdêlienge gebeurde, wa da uutendelik d' êeste beschoaviengn deed ountstoan in Egypte, den Indusvallie en Mesopotamië.

D' oontwikkelienge van 't geschrift makteg' het meugelik van informaasje nog beter deure te geevn en te bewoarn. Terzeldertyd wierdn ook andere typisch menselijke activiteitn gelik godsdienst, technologie en d' êeste wetenschappn oontwikkeld. De groei van de menselyke kennis en technologie gerakte in Europa in een stroomversnellienge met de wetenschappelyke revoluusje in de 17^e en d' industriële revoluusje in de 19^e êuwe, en azô is de bevolkienge van 800 miljoen in 1750 toe mêer dan 6 miljaor toegenoomn.

Interne koppelienge

- [Evoluusje van den miens](#)

Referensje

1. [Geography.about.com \(http://geography.about.com/od/obtainpopulationdata/a/worldpopulation.htm\)](http://geography.about.com/od/obtainpopulationdata/a/worldpopulation.htm)

Overgenomen van "<https://vls.wikipedia.org/w/index.php?title=Mens&oldid=304493>"

Boovnstoand blad es vo de latste ki veranderd om 15:46 ip 25 mei 2020.

De tekst is beschikbaar onder de licentie [Creative Commons Naamsvermelding-Gelijk delen](#). Er kunnen aanvullende voorwaarden van toepassing zijn. Zie de [Gebruiksvoorwaarden](#) voor meer informatie.